



ՄՈՍԿՎԱՅԻ ԵՎ ՀԱՄԱՅՆ ՌՈՒՍԻՈ ՊԱՏՐԻԱՐԺ
ՆՈՐԻՆ ՍՐԲՈՒԹՅՈՒՆ ԱԼԵՔՍԵՅ Բ-ԻՆ

Մոսկվա

Զերդ Սրբություն,

Հոգեկան մեծ գոհունակությամբ կարդացինք Ձեր 24 փետրվար 1994 թվակիր նամակը, որով մի անգամ ևս անդրադառնում եք դարաբաղյան ցավոտ խնդրին, որ վերջին չորս-հինգ տարիներին այնքան զոհեր է խլում թե՛ հայ և թե՛ ադրբեջանցի հաղևած ժողովուրդներից: Դարաբաղյան հակամարտությունը մեր ժամանակների ամենածանր ողբերգություններից մեկն է հանդիսանում:

Մենք ջերմապես գնահատում ենք Ձեր բարի զգացումները՝ մի արդար ու խաղաղ լուծում գտնելու դարաբաղյան ողբերգության, ինչ որ նաև Մեր ամենօրյա աղոթքն է ու երազանքը:

Եղբայրական սիրով ընդառաջում ենք Ձեր առաջարկին և այս օրերին իսկ պիտի հղենք Մեր դիմումները հակամարտող կողմերին՝ կոչ անելով նրանց, որ ամեն ճիգ ի գործ դնեն նախ դադարեցնելու համար ամեն տեսակի ուղղակի գործողություններ և պատրաստելու բարենպաստ պայմաններ, կողմերի միջև բանակցություններ սկսելու, գտնելու համար ցանկալի լուծումը դարաբաղյան հակամարտությանը՝ հիմնվելով ազգությունների ազատ ինքնորոշման՝ միջազգայնորեն հռչակված սկզբունքի վրա:

Մեր խնդրանքն է, որ նաև Ձերդ Սրբությունը իր աղոթքներով նպաստի խաղաղության և համերաշխության հաստատմանը Անդրկովկասում: Մենք նաև մեծապես շնորհակալ պիտի լինենք, եթե Ձերդ Սրբությունը հարմար գտնի միջնորդել Ռուսաստանի

Ֆեդերացիայի նախագահ Մեծահարգ Տիար Բորիս Ելցինի մոտ, խնդրանքով, որ նա բարեհաճի իր բարձր հեղինակությամբ նշանակել ղարաբաղյան հարցի խաղաղ ու արդար լուծման:

Այս առթիվ Ձերդ Սրբությանը ներկայացնում ենք Մեր ջերմագին շնորհավորանքը Ձեր 65-ամյա տարեբարձի առթիվ՝ մաղթելով, որ Տերը Ձեզ մնա միշտ պահապան և զորավիգ Ձեր հովվապետական առաքելության ճանապարհին՝ ի ծաղկումն Ռուս Պապոսչայվ պատմական մեծ Եկեղեցու:

Եղբայրական սիրո ողջունիվ ի Քրիստոս՝

ՎԱԶԳԵՆ Ա
ԿԱԹՈՂԻԿՈՍ ԱՄԵՆԱՅՆ ՀԱՅՈՑ

Ա. Էջմիածին,
7 մարտի 1994 թ.

